

怀麓堂全集

懷麓堂全集

懷麓堂文稿卷二十三

哀辭行狀

嘉禾姜封君哀辭

南京刑部郎中嘉禾姜君用貞予知己友也嘗道其
先君之德于予君未六十而沒于今若干年予懷思
之而不可得見焉從而爲之辭辭曰有子克孝式揚
厥先曰有世望嘉禾之間巖巖徵君負抱奇傑內秉
剛毅外鑒清徹蒐羅百家景仰羣哲雄詞逸辯瀾翻
障決逢時不造家步頓跌勃興其餘有奮無蹶乃如
君才俾有教設羣疑衆紕盤根錯節孰不就緒毫分

寸析終焉淪喪飲恨而絕孔融重交季布持諾談笑
訟解纓冠鬪息道畔寧力分財寧薄人笑其拙我執
愈確有如君義幸有攸託白刃可蹈三軍可奪如何
弗施白首丘壑九原是歸違者誰作鄉曰義士士曰
嚴師考德問道如龜如蓍既誦嘉言亦瞻令儀于生
有歸于死勿忘韋刳布裳不掩其輝人生之榮匪紱
與圭有美郎官冰心蘄操人謂賢子繇父之教睿藻
宸書其章孔炤帝曰汝賢以勸爲孝東隅之失桑榆
之茂孰謂公死不食其報事有莫致情有固然有涯
者身罔極者天羣魚泣水悲風在顛王哀灑血栢爲

之殘盡哉孝子胡不其憐月旦有評大史有文歲月
既邁陵谷亦遷公德斯傳百千萬年孝子盡哉以慰
爾虔

松塢黃公哀辭

予讀黃巖謝大史所爲松塢黃公傳而哀之曰黃公
蓋其鄉賢者也今不可作矣哀哉人生逾八十而沒
不爲天生有子子沒又有孫皆貴且賢不爲晦沒而
葬葬而墓木已拱于今數十年不爲近若是者皆無
事乎哀予獨念公之能使士信其直盜匿其名而僮
僕遠于罪可謂盛德而哀今之人莫之能也抑以重

哀夫今之人之哀之異乎此也爲之辭以遺公之孫
曰文選君世顯者其辭曰台之山山思而水號霜雪
惜栗兮艸卉凋崖嶽谷嶇兮道路險以撓虎豹伏匿
兮狼狐嗷嗷歲旣暮而改色見東流兮滔滔家巍巍
兮孤存魂一去而莫爲招聊撫景以慨俗懷佳人兮
鬱陶悲乎傷哉今之人鬪捷夸妍爭儼競浮錙銖相
傾睚眦爲仇視犴狴爲堂室化冠裳爲戈矛泐狂瀾
之萬疊瞻砥柱兮中流悲乎傷哉今之人鼠社城孤
蠅奔蚋趨招曹嘯羣什伯其徒磊氷成山炙手成爐
以羝縣爲市集以賄賂爲菑畲念誰爲之扼拒莽前

路兮長驅吁嗟黃公狷介之節朴茂之風有覩其貌
無疑乎其中予不必恡取不必豐辯我者爲喑嘿誑
我者爲盲聾盜飲德以懷愧僕銜恩而效忠彼瑣兮
若此又何論乎耆老之與兒童吁嗟黃公家有冠組
不華其躬門有車馬不藉爲龍不轢衆以自力寧歛
盈而若空暮閉門之泄柳嗤返駕之周顒彼鄉飲兮
不可以屈致矧辟書之可通吁嗟乎黃公世寧復有
斯人哉吾將操几杖以從之也過公之鄉兮斗斛不
欺入公之門兮左書右詩聞公之子兮公子孔碩見
公之孫兮公孫孔儀慨老成之凋謝庶典型之在茲

縱往轍兮既駕亦遺踪兮可追已矣乎歲華歛兮萬
物歸浮生盡兮大運非歎義景之莫繫傷零露之易
晞諒今古之一揆孰彭殤之有違匪遺德之罔既奚
若人兮獨悲已矣乎吾生不可以復見徒隕涕而拭
衣

董封君孺人哀辭

翰林編修寧都董君尚規既喪其考文林公三十有
五年始復喪其母孺人溫氏予徃弔問之時君哀甚
且答且泣咽不成辭既數日得君所爲行狀蓋其事
有誠足哀者爲之辭二篇以洩其情若公及孺人之

賢已爲館閣諸公所著者茲不復贅而亦不必贅也
其辭曰大兒五齡兮婦三十君中捐兮百憂集執兒
手兮屬婦吾不兒父兮兒有母燠寒兮渴飢兒心兮
母知壯無使遊兮少不可使嬉敬爾如父兮畏爾如
師豈不兒憐兮無禽犢爾爲兒官兮兒祿念遺言兮
如夙昊天兮罔極兒生有身兮豈其可贖賣田兮買
櫛然松明兮代燭携孤兒兮墓哭淚班班兮石爲竹
朝辟纁兮夜續我分勞兮婢僕父書兮兒讀布衣兮
蟄粥悼吾人兮未亡非此輩兮安屬兒得官兮歸來
爛高堂兮命服愛桑榆兮獨茂嗟往事兮誰逐傷別

離兮伊邇念歸寧兮不復哀皇天兮茫茫胡白日兮
大速慨吾生兮摧肝飲予恨兮終曲

余通判哀辭

南昌余鼎寔爲温州通判藩臬部使者交薦其賢獲
荷錫典成化丁酉述職京師道南昌卒于家君之繼
室娶于學士謝先生之子先生與君厚且親謂其材
行有餘而位與壽皆弗稱可哀也旣爲文以傳其家
覆屬予爲之辭其辭曰油屏兮黎輶侯之來兮越州
山川繆兮阻且修歲奄忽乎春復秋吏民歌兮擁道
周侯將行兮不可留鸞書兮錦裳侯之歸兮故鄉入

我戶兮登我堂子列侍兮孫扶將志弗違兮身靡康
胡爲中年兮罹此殃越之岡兮楚之阪魂朝馳兮暮
返望東華兮野色芳艸萋兮將晚慨時命兮不逢哀
壯士兮中蹇馳巫占兮詹卜誰復問兮修短長繩兮
落日蒼天茫茫兮豈其可縮吉地兮良辰侯之輜兮
兩輪佳城鬱兮彼原送者默兮如雲緇有緇兮刻有
文生弗達兮死有聞九京兮可興亦將感兮吾文

程襄毅公哀辭

繫程伯之在周兮繁華胄于南邦越襄毅之挺生兮
氣廓落而開張珠照乘以馳輝兮金曜冶而騰光聲

鈞震耀極宇宙兮孰不知快觀之爲祥君門突其巍
峩兮歷諫省而高步值國是之多疑兮抗英聲乎言
路分侯藩以來宣兮望遼海而東驚西畧乎岷嶓之
墟兮擣夷獠之巢戶領大僕與內臺兮載經營乎東
鄙承黼命于先朝兮寔受知之所始歷南都而軼西
曹兮命屢下而載庚朝濤若而暮陸處兮寢食惕焉
其弗寧有夷獠于西南兮駭羣言之如沸皇授鉞于
大司馬兮駕戎車而言邁陵嶽欽谷戲宥乎不可名兮
曰豹尾與龍背驅倏猱于坤隅兮掃挽槍於天際歌
凱奏而還朝兮六旅爲之增氣紀名氏於大常兮冊

兩官於一制身抱疾以思退焉疏屢上而弗俞贊畱
務于南都兮曰惟老成之是須物不可使過盛兮寵
吾獨可久居超一去其不復還兮皇軫念而莫予拘
涉山川以遨遊兮巾予車于歛之野製蘭楫與芰裳
兮作晴州之釣者歛予福以全歸兮顧命服之在躬
彼貴富之罔不崇獨耆壽之不終維國有華焉公亦
既有子也美弓裘之未艾兮公寧獨憾乎此也樞子
衣以登階兮及公年之未衰發予棹于龍江兮曾歲
月之幾時顏父子以翱翔兮敢忘情於欣戚悵芻束
之莫將兮邈長風而大息維瀛有洲兮維芝有山維

公何歸兮往來其間木經秋而改色兮鳥千歲而知
還彼大化之無垠兮歸萬幻於一端孰泯泯其不忘
兮孰耿耿而無存國有史兮家有乘嗟公之賢兮孰
使予之多言

追封涇國公將侯哀辭

悲風颯其何來兮塋塵沙之蔽空奄西日之不我留
兮歎川流之既東星夜隕而無輝兮劍沉秋於碧淙
感時序之屢移兮哀壯士之不終公何歸乎公將瘞
風而遠遊四方上下杳不可名兮吾將巫陽之是求
胡水萃其峻嶒兮凜穹廬之不暖彼衣垢而食腥兮

悵華風之日遠襍諸羌之異種兮語喁晰而不通爛
鬼燐於沙塲兮倏晝昏而夜明陟蜀徼于西南兮燹
道阻其如棘隩硯房以爲巢兮構篁簞以爲室莽白
骨之縱衡兮血濺濺其相射夔魑魍錯然而成羣
兮或睢盱而跳躑生秉節以周遊兮魂髣髴而不止
公乎歸來兮胡爲獨樂乎此帝閭兮九重粲瑤堂兮
紫宮屹巖廊兮在望麟閣起兮層空桓圭兮衮衣公
歸來兮此中棘門兮幕府左幢牙兮右弓釜趨金章
兮走朱組令之行兮莫予敢逆公不歸兮何所甲第
兮高堂繡爲桷兮雕爲梁曳華裾兮飄綺裳闢捷獵

兮紛成章瑀盤兮玉膾薦旨酒兮芬芳吳歎兮越謳
歌宛轉兮何長公樂其歸兮樂且無央涇之封兮楊
之里地之靈兮橋木生梓河爲帶兮山爲礪鐵爲券
兮金縷字國有臣兮公有子楊休光兮延錫祉家千
年兮廟百世公不歸兮竟何逝吹龍籥兮鳴鼓鼉攬
余轡兮巖之阿鐵兜鍪兮金盤陀驅絳轂兮蔡赤馱
遡靈颺兮汎僊槎公不歸兮柰公何茫茫九陔兮渺
不可以及山蒼蒼兮海增波

明故廣西按察司副使致仕進階中議大夫贊
治尹劉公行狀

公劉姓諱仁宅字廣居其先山東東平州人宋南渡有都統制諱寶者從岳武穆岳鶚間始居華容大父諱必弘考諱行簡贈監察御史妣周氏封孺人公生八歲日誦數千百言年十五能屬文補縣學生永樂庚子舉湖廣鄉薦卒業國子正統庚辰拜江西瑞昌知縣躬省田畝教其民始作織事溪山中有流民千餘家邏者徃索賂不得與鬪不勝則妄言民反有司議兵事甚急檄公先徃公單騎至山口招之民喜曰劉知縣至矣爭出自辦公返命曰無他請以身保兵遂息九江屯兵多侵暴土著公嚴立條令執其尤者